

續
文
獻
通
考

續文獻通考卷之四十七

皇明進士雲間王圻纂輯

選舉考 孝廉 武舉

宋

寧宗嘉定八年詔大郡歲舉廉吏二人小郡一人

理宗寶慶元年詔侍從給舍臺諫卿監郎官及在外諸路
帥臣監司各舉廉吏三人 景定元年上曰士大夫奔
競之風可畏涓擇一二恬退之士奏聞庶可以勵其餘
尋詔趙景緯歐陽守道陳大中有靜退之節以景緯爲
秘書郎守道史館檢閱大中主管禮兵部架閣文字

是年七月上曰孝廉所以化元元移風俗也此事久廢

民罔攸勸可下郡官各舉一二人務以實聞令學士院降詔敕門下孝爲百行之先廉爲四維之一三代以上風俗淳而孝廉之名泯迨漢始詔以此舉士當時二千石不舉孝以不敬論不察廉則免其嚴且重如此我國家以孝治天下以廉察吏治科雖不常設固有不待舉而勸者比年以來澆風汙習瀾倒莫返朕甚憫焉然念良心所蘊誰獨無此特爲善者無所勸不善者莫知過表勵之道未至焉耳今嘉興宇內之士同歸于善舉孝廉如漢法夫孝廉一本也好貨財則不得爲孝哇毋食則不得爲廉以菽水爲樂者行必不污以冰蘖自持者親必不辱詔下之日凡吾帥守監司令長采公論攷實

行各疏其事以名聞朕將尊顯之以爲臣子之勸

衛涇應詔舉真德秀等充廉吏其狀曰臣伏准尚書省
劄子并吏部牒中書門下省八月十八日三省同奉御
筆可令侍從兩省臺諫卿監郎官及在外前執政侍從
諸路帥臣監司各舉廉吏可以爲表勸者三人疏名聞
奏以備選擇者右臣衰病退老不與世事相接然有朋
舊來訪生死因及一二竊聞近來貪吏稍多剝民尅軍
一切聚斂民之膏血竭矣民惟邇本本固邦寧民心一
搖關係甚大聖天子初政軫念及此特降御筆令舉廉
吏以表勸之愛護邦本此意切矣臣知陛下非應故事
爲觀美而已臣竊爲今日一州一路惟大吏貪黷爲甚

小吏固有貪者然民之被害尚狹若大吏貪黷民之被
害有不可勝言小吏之廉亦豈無人但泛泛枚舉恐未
足爲表勸非明詔之意若大吏之貪者非臣所當言敢
以大吏之廉足以表勸風俗若三人爲陛下言之臣竊
見前知泉州真德秀章棟二人天資潔廉操守純固泉
南多舶貨賢士大夫間有不免而二人者前嘗爲泉皆
於舶貨毫髮無所取去泉之日舶商擁道攀送以大香
炷餞其行二人者皆卻不受商人無以效其勤持香至
郡治曰此吾欲獻使君而使君皆不受吾安可復留以
大鑪炷香於郡之門香聞闔府相與涕泣而祝之何施
而得此於人也傳曰臨財毋苟得司馬遷薦李陵云臣

見其臨財廉士大夫平居暇日未嘗不曰能廉至臨財
未免有可議而二人者臨財如此可謂忠信行乎蠻貊
矣又見前知汀州趙崇模廉介有守不自表暴臨汀大
禮年分進奉本色銀二千兩及支犒諸軍八千餘貫兩
項共爲一萬五千緡例取之縣縣敷之民崇模到任即
自於州家抱認嚴戢諸縣敷斂民咸德之又諸寨土軍
久不補刺崇模任內刺百餘人二年所支錢糧自當萬
五千緡皆州郡樽節支遣於民間賦稅日前所欠並與
倚閣邦人翕然以爲前此守臣蓋未嘗有大槩汝愚諸
子皆能守家法而崇模賢譽益高此三人者皆大吏之
廉足以爲表勸者今德秀已蒙公朝權至禁從章棟見

蒙收召崇模今爲輔郡公朝已皆獎用似不待臣言者
然臣區區竊謂使大吏之廉者皆如此三人則斯民蒙
福邦本益固實萬世無疆之休故特述此三吏之廉節
風厲天下庶大吏之貪者苟有羞惡之念必知愧悔若
小吏之貪者聞大吏之廉必皆化而爲廉所謂中人以
上可以語上也其關係風俗之樞機實非細事是敢冒
昧奏聞

真德秀謝獎廉吏奏劄曰臣今月十六日伏准尚書省
劄子八月十五日三省同奉御筆近真某奏事朕因訪
問廉吏其以知袁州趙斂夫對朕惟獎廉所以律貪亦
庶幾化貪爲廉之效以惠吾民趙斂夫可除直秘閣與

監司差遣劄送臣者伏念臣比叨召札入對便殿具陳
生靈耗斁之由皆本州縣貪殘之故淵衷有惻天語載
詢欲知廉吏之姓名以備聖明之采擇念頃過宜春之
境嘗聆守土之賢百口自隨惟祿是仰一介弗取其節
可稱遂以所聞具陳于上退而竊省尚有當言若崔與
之帥成都但載歸艗之圖籍楫長孺守長樂罔侵公帑
之圭銖皆最爲當世所推乃不能悉數以對方重愚臣
之休惕忽傳宸筆之褒敷當九重勵精思治之秋正四
方視儀聽唱之日一守臣之蒙擢殆若細微百執事之
向風孰不興起祇承命告倍切忻愉汗吏革心實關公
道瞽言獲用豈曰私榮願承明詔之作新更廣宸聰而

咨訪循良未舉蓋宏封密之規貪濁當懲可廢烹阿之
典乃若澄源而正本尤先昭德以塞違使清光之化首
倡於朝廷而廉耻之俗交興於中外庶幾民生日厚邦
本弗搖此下臣獻替之微忠抑初政施行之急務敢因
奉謝僭有敷陳伏乞睿察

紹定二年臣寮奏乞歲舉廉吏申嚴保任之法如犯奸
駐與之同罪仍令監司郡守覺察從之

度宗咸淳五年詔吏以廉稱尚然今寂無聞意者不能以
自達其令侍從卿監郎官各舉所知摭拾以聞庸備選
擇 八年詔舉廉律貪

金初有溫廸罕幹魯補西北路猛安人年十五居父喪不

飲酒食肉廬于墓側母疾剖服療之疾愈詔以爲護衛
世宗大定三年命舉到廉能官第一等進官一階陞一等
其次約量注授汚濫官第一等殿三年降二等次二年
又次一年皆降一等 詔問猛安謀克廉能者第一等
遷兩官其次遷一官汚濫者決杖罷去擇其兄弟代之
第二等杖八十第三等杖七十皆令復職 十一年削
凡廉能官四品以下委官覆實同則陞擢三品以上以
聞朕自處之 十三年四月以有司言制特授洛州孝
子劉政太子掌飲丞 八月詔賜諸猛安謀克廉能三
等官賞 二十年十一月諭宰臣以郡守選人資考雖
未及廉能者陞用之以勵其餘 二十七年以實抵尉

蒙括特末也清廉雖非全才進官一階著爲令

章宗明昌元年九月以廉能擢北海縣令張翔等十八人
官 三年八月有司奏寧海州文登縣王震孝行以嘗
業進士并試其文特賜同進士出身仍注教授一等職
任 十月勅御史臺提刑司自今保申廉能官勿復有
乞陞品語 十一月尚書省奏益都府舉王樞博學善
書事親至孝特賜同進士出身附王澤榜 泰和元年
十二月初定廉能官陞注格

元世祖至元十五年命行中書省吏廉能者舉以聞其貪
殘不勝任者劾罷之 十九年令各道提刑按察司舉
廉能者陞等遷序

成祖元貞二年命廉訪司歲舉廉幹者名二人 大德九年詔孝子順孫堪從政者量才任之 又詔令御史臺翰林集賢院六部千五品以上各舉廉能識治體者三人行省行臺宣慰司廉訪司各舉五人

武宗至大四年二月旌舉漳州長泰縣民王初應孝行
仁宗皇慶元年旌舉廣州路番禺縣孝子陳韶孫

順帝至正八年三月詔以東帛旌郡縣守令之廉能者
皇明

太祖洪武中布衣李德成以孝子舉爲光祿寺署丞遷陝西右叅政右布政使張信舉爲尚寶司丞遷少卿至卿以終 又李希明浙江東陽人洪武丙子舉孝廉建文

四年以江西叅政攝刑部尚書事 又劉敏直隸肅寧人
洪武初舉孝廉十三年任刑部右侍郎十四年出爲
徽州同知 又麥志德廣東連山人姓嚴洪武初年以
孝弟力田舉十七年任工部尚書十八年坐累伏法
又鄭沂浙江浦江人洪武中舉孝行三十年拜禮部尚
書三十一年致仕

成祖未樂八年總旗張法保到肝療祖母旌權如張信例
武寧人張仲賢到肝療祖母旌如張法保例擢鴻臚寺
司儀署丞 又權謹徐州人未樂中舉孝行洪熙元年
拜文華殿大學士本年改通政司右叅議致仕

武舉

宋

寧宗嘉定五年詔諸路總領官歲舉可爲將帥者二三人
安撫提刑舉可備將材者各二人 六年詔三衙江上
諸軍主帥各舉堪爲將帥者二三人 八年詔侍從兩
省臺諫各舉將材三人 十年詔監司郡守各舉威勇
材畧可任將帥者二人 十一月詔由武舉進者復應
文舉 朱同宗嘉定間中武舉狀元謀猷經畧重于一

時

理宗寶慶元年七月詔侍從兩省臺諫三衙在外諸路監
司帥臣都副都統制及屯戍諸將各舉堪充將帥三人
嘉熙二年正月詔宰執侍從臺諫卿監郎官帥臣監

司舉曉暢兵機通練財計者各二人三衙及諸軍都副
統制舉堪充將材者二人咸以其實來上 四年詔邊
塵未靖備禦方嚴必藉人才相與協濟令內而侍從臺
諫兩省知監郎官外而監司帥守舉文武之臣曉暢兵
機練習邊事才畧卓然可用者各二人或陸沉常調或
負累家居著其實狀亟以名聞以待擢用 淳祐元年
詔有堪充將帥之人混迹偏裨墮身邊遠無由自達令
三衙諸衛外閫戎帥各舉三人孰爲智將孰爲勇將孰
能管精銳覈虛實以體國孰能明紀律禁侵暴以安民
各指實來上朕將甄別器使 四年御後殿閱武舉進
士射 六年詔侍從臺諫各舉堪閫寄及餉事者述其

才器勞績以聞 十二年八月詔舉帥材 衛涇奏舉
封彥明克將帥其狀曰准嘉定五年十月都省諸路帥
憲許每歲奏舉可備將材及堪克鈐將以上任使者各
兩人於奏內聲說或不如所舉其同罰罪隨以姓名籍
之省府候將帥有闕參以衆薦次第除用如經錄用有
誤使令檢照元舉官重加責罰以革徇私覓舉之弊臣
竊惟養之當有素而不可取於臨時者將材也自頃用
兵江淮諸將遇敵輒敗蓋習風奔潰者多有之豈非蓄
養無素而取具臨時之過歟臣伏見降授成忠郎封彥
明奮身行伍有志事功頃在兵間粗著勞效方和議未
成時制置大使丘崇嘗薦於廟堂臣於是時實備位政

府崇謂其人材武勇若獎勵作成之他日必爲朝廷之
用頃因峒寇猖獗自殿司統制移飛虎軍本以才選偶
不諳地利失於輕動遂致敗衄因此罪斥然其御下整
肅能與士卒同甘苦軍中至今思之謫居秭歸未蒙漸
後憂患頓挫當益增其所未能廢棄之久實爲可惜臣
一向退閒與丘將官交接敢以所知上塞明詔伏望聖
慈素過匪瑕特賜甄錄以備邊防之儲亦激勸將才之
一術也臣今舉彥明係嘉定六年第一員之數後不如
所舉臣甘坐謬舉之罰

淮東制置使李曾伯薦余鼂王登克將帥奏曰臣准尚
書省劄子三省同奉聖旨令內而侍從臺諫給舍外而

制閭各舉帥材二人臣竊惟薦材固難薦帥材尤難古
者方召遠矣今人謀三軍之帥將以僭一時之選層旨
誣頒猥令薦進豈不謂觀臣以其所主惟善能舉其類
乎顧臣本無材畧忝任藩翰揆已不足安能知人爲之
踰月議圖其位望之已著者固不待微言之推揚其聲
名之未遠者則有得於共事之更歷今有二人焉竊見
胡本郎前知建昌軍事余鼇自任高郵尉而留淮募臣
見其諳軍民利害得將士心願願昂昂有遠到器議論
本乎正大趨向不爲卑污臣命夏臯修泗上承下接皆
鼇贊之最一事尤爲有識往時鼇初擢第值遣使諭蜀
道拉鼇偕行耻於依怙并以吏事自見臨節而不可奪

於此可占今稍更霜露之氣殆益老矣宣義郎通判襄陽府兼荆湖制機王登昨以秭歸尉而留荆幙臣見其曉兵家韻畧通當世政務磊磊落落無罷軟習政事多所規益言議不爲依阿臣命高達復襄右撐左柱實登佐之最一節尤可書往時登以勇爵因獲寇詰荆閩怒登不拜翻然舍去卒以儒科自奮有志事竟成於此可觀今又在風寒文理寔加密矣是二人者臣察之已熟故敢薦之不疑抑又有說焉馬厯金懷之無取則可以臨羌桑株田頃之弗多則可以慕亮如鼂如登臣嘗與之講論及此使遂展布必可保其能自廉飭臣愚欲望聖慈下有司籍記姓名特加旌擢以爲事任之儲如後

不如所舉臣并坐謬舉之罰

寶祐五年詔三衙及江上諸軍應從軍職事並無戰功者不許釐務差遣果有材畧功績從制闡保明却與釐務

遼聖宗統和三年七月比皮室詳穩進勇敢士七人 十二年十一月詔諸道軍有勇健者具以名聞

金武舉始于皇統時至承安四年十一月許諸色人試武舉其制則詳于泰和式有上中下三等能挽乙石力弓以重七錢箭竹百五十步立貼十箭內府試欲中一箭省試中二箭又遠射二百二十步梁三箭內中一箭至者又百五十步內每五十步設高五寸長八寸卧鹿二

能以七斗弓二大鑿頭鈇箭馳射府試則許射四反省
試三反程試二反皆能中二箭者又百五十步內每三
十步左右錯置高三尺木偶人戴五寸方板者四以槍
馳刺府試則許馳三反省試二反程試三反左右各刺
落一板者又依廕例問律一條又問孫吳事十條能說
五者爲上等若一有不中者皆黜之若射貼弓八斗遠
射二百一十步射鹿弓六斗孫吳書十條通四爲中等
射貼弓七斗遠射二百五十步射鹿弓五斗孫吳十條通
三爲下等解律刺板皆欲同前凡不知書者雖上等爲
中中則爲下凡試中中下願再試者聽舊制就試上等
不中不許再試中下等泰和元年定制不分舊等但從

所願試中則以三等爲次二年省奏武舉程式當與進士同時今年八月府試欲隨路設考試所臨期差官恐以朔立未見應試人數遂權令各處就考之 六年九月勅行尚書省有方畧出衆武藝絕倫工幹辦事工巧過人者其招選之

宣宗貞祐三年武舉中者同進士例賜勅命章服時以隨處武舉入試者自非見居職及已用于軍前者令郡縣盡遣詣京師別爲一軍以備緩急其被薦而未授官者亦量才任之又詔近臣舉良將 興定二年四月特賜武舉溫迪罕繳住以下共一百四十人及第 七月用點檢承玄言遣官詣諸路選寄居守闕丁憂官及親軍

入仕官堪總兵者得一百六人付樞密任使 五年四月詔親軍中武舉第而授職需次者仍執舊役廩給循常闕至發遣 元光二年東京總帥紇石烈牙吾塔言武舉入仕皆授巡尉軍轄比曹雖善騎射不歷行陣不知軍旅一旦臨敵恐致敗事乞盡括付軍前爲長校俟有功則升之宰臣奏國家設此科與進士等而欲盡實軍中非獎進人才之道遂籍丁憂待闕去職者付之

元世祖至元二十年二月定軍官選格

順帝至正十五年聽富民願出丁壯義兵五千名者爲萬戶五百名爲千戶一百名爲百戶降官勅牌面

皇明

武舉鄉試條格

凡遇子午卯酉年十月武舉鄉試預於九月內各衛所起送都司府州縣達布政司類送巡按御史會同三司官考驗定數仍行都司起送五府轉送兵部布政司起送兵部兩京衛所俱送中府候到齊之日中府掌印官會同各府并鋪衣衛各掌印官考驗定數類送兵部直隸衛所留守司大寧萬全都司并各府州縣俱各送巡按御史考驗定數仍行各都司直隸府州縣衛所照例起送其十月內考驗日期并選取之法一倣武舉會試例行各處起送應武舉之人務要詢訪素無過犯操行端謹言貌出衆膂力過人及考驗弓馬熟閑荅策通曉兵

法者各開明白方許以禮起送不許求足額數一槩濫舉

武宗正德十四年六月該兵部題所行事件開坐在京武舉鄉試照武學考驗例本部侍郎一員會同各府掌印官并錦衣衛掌印官於團營東官廳南京兵部尚書會同南京各府掌印官并南京錦衣衛掌印官於教場各考驗都察院并南京都察院各差監察御史一員監試在外布政司於所在教場或貢院考驗直隸去處并各邊聽各該巡按御史定擬適中相應去處考驗兩京并各處武舉鄉試考驗等官并執事官軍終場對策人員茶飯及各用紙劄筆墨心紅等項北京照舊例各營出

辦南京聽南京兵部於本部收貯各項官銀內支給措辦在外聽各該巡按御史定擬於各都司布政司府衛量數出辦初場二場試箭合用金鼓旗號響器并監箭巡視等官三場搜檢巡綽官軍在京行三大營南京行大教場定數差撥其刊刻題目匠役兩京俱於府縣取用在外聽各該巡按御史定撥取用及印卷彌封等項執事官俱照舊例初場試馬上箭以三十五步爲則二場試步下箭以八十步爲則各要發弓平矢直衝把子中央者爲中如有創箭并中把子旗者俱不准三場試策一道兩京照先年圍營武舉例兵部官出題在外俱巡按御史出題其策問或據古兵法或問時務惟在簡

要合書以觀其才識不必專據紙上陳言徒取記誦致遺真才內有先年已曾起送赴部會考不中之人今次又來會試許一體考驗起送其考取之法凡有五等通照武舉會試兩京各衛所保送各府類送中府上十衛并武學徑保送中府其各衛所保送應舉人員務要各開平素謀勇習學騎射兵法並無曾經問發等項緣由明白及各處考語起送在外司府州縣衛所保送人員亦同本月二十三日題奉 旨是這武舉鄉試條格都依擬行便行與南京及在外各該衙門知道欽此今照兵部侍郎爲本兵之佐既知武舉會考難以又典武舉鄉試及查各處應舉人員俱送巡按御史并三司等官

考驗合將兩京衛所應試者亦送各該御史考試類送
兵部其考驗去處并執事等官軍匠役及茶飯紙劄筆
墨金鼓旗幟等項聽各該巡按御史臨期從宜處置取
用俱於該年十月內舉行射箭日期并策論題目亦聽
各該御史自定武學官生弟姪於兵部月考馬步箭策
畧第一等內選送

世宗嘉靖三十年十月兵部覆湖廣襄陽等衛武舉官生
許獻中等奏曾經三次鄉試中式官生逐一查明登記
在官開科之年查照文舉會試事理不拘官舍軍民免
其再試各省從布政司兩直隸從本府申呈撫按衙門
取具各該官司供結給與批文仍量給路費與同新科

鄉舉之人一體赴京會試其有已經給文別無事故而不行赴京者各司府官訪出係軍職參奏軍民舍餘問革仍將原給文引路費通行追奪若非三科以上者軍衛有司不許朦朧起送永爲定規 應試人員各該官司嚴加考選不拘名數起送 監生省祭官生員俱不許應試 武生作文依例迴避 御名 廟諱 親王名諱不許違犯惟二字不偏諱 武舉會試既奉 欽依改于秋九月舉行其各處取中鄉試人員合于次年五月以後各該官司查例應付脚力口糧並部會試 穆宗隆慶二年六月兵部覆提督四夷館太常寺少卿武金奏竊照武科規制定自 先朝別立科名似難輕擬

但本官所論于兼收并蓄之中寓隨材器使之術不爲
無見相應酌議除武舉仍遵照舊規外合候 命下本
部通行各省撫按衙門轉行各該守巡兵備等道督令
府州縣等官示諭軍民人等自今年爲始但有智通兵
機或力勝二百斤以上或善射或善鎗或善刀弩或善
火器等項藝能之人每年通以春季爲期不必拘定名
數許令自投到官州縣官取其里老并結廠加考校要
見某人有何機智可以出奇某人有何勇力足以任重
某人善射果否巧力俱優諸如此類果係不凡方許申
送該府府守驗中方許呈送巡按御史選中量授衣巾
克爲武生免其雜泛差役候至開科年分各府給文類

送巡按御史除精通論策者照舊隨武舉入場外其餘俱候武舉場事畢日御史公同考試將智勇俱優者列爲一等精通一藝者定爲二等各照武舉優待其最劣者發回原籍當差取中之人行令該府量資盤費給文起送到部本部于會試之年照例于武舉場事畢日將送到武生公同監試御史通行考驗其不中者發回肄業中者不必分等止將爲首一人量給冠帶咨送薊鎮軍門充爲名色把總領軍教練餘俱分發京營并各邊立爲教師名色即充隊長教練各軍俱許隨軍食糧差操三年之間獲有功次挨陞職級如無功績但係訓練有成教師即補把總把總即補千總月加米一石與武

舉一體保薦推用如或在營教練無成不肯向上者聽督撫官徑自革回起送之時各府州縣如敢徇情濫送聽巡按御史指實糾治等因奉 旨這武生你會同監試御史驗果有勇力技能的咨送薊鎮軍門再行覈實徑自去留京營及各邊且不必發去

武舉會試條格

世宗嘉靖元年兵部等衙門會議每遇文舉鄉試之年行移天下招諭各色人等堪應武舉者俱從巡按御史於該年十月考試兩京武學於兵部月考優等選取俱送兵部會數於次年夏四月開科初九日初場較騎射十二日二場較步射十五日三場試策二道論一道先期

請命翰林院官二員爲考試官給事中并部屬官四員爲同考試官取中名數臨期請旨上裁試畢一應

有事場屋官員并中式之人照文舉事例梓其姓名錄其弓馬策論之優者裝潢成帙題曰武舉錄進呈

虞覽仍出榜於兵部門首張掛次日早引赴御前叩

頭畢預事官俱赴中府會武宴亦照文舉廷試事例

預行光祿寺設辦仍請命內閣重臣一人主席宴畢

該管備鼓樂職方司官二員送武舉第一人歸第兵

部覆奉欽依合照天順八年事例初場馬上各以中

四箭以上爲合式二場步下各以中二箭以上爲合式

取中人員比照文舉會試錄列名不必分爲等第俱陞

署職二級嘉靖十七年欽奉 聖諭武舉着秋行後會
舉亦秋行方合其義欽此該本部議於秋九月舉行以
後開科年永爲遵守 二十二年該本部覆議照依會
試南北卷事例分別邊方腹裏庶得其用 二十九年
本部再議覆奉 欽依合照歷科舊規仍以邊方腹裏
分定則例邊方取三分腹裏取二分 三十二年本部
題奉 欽依應試官生曾經三次鄉試中式者查照文
舉會試事例不拘官舍軍民免其再試各省從本布政
司兩直隸從本府申呈撫按衙門給批赴京會試若非
三科以上者軍衛有司不許朦朧起送永爲定規

今上萬曆五年二月兵部尚書譚綸等題本年九月例該

武舉合照節年題定事例舉行本院暫掌印左副都御史卽光先等題差御史劉良弼郭思極二員監試武舉奉 旨近來武舉官生亦有願倩懷挾等獎者監試御史嚴加巡察有違犯的照文舉例行

續文獻通考卷之四十八

皇明進士雲間王圻纂輯

選舉考 薦舉

宋

理宗寶慶元年詔舉賢良之士 淳祐十年詔舉制科

景定二年詔禮部國子監以有出身人附銓試場應詞
學科照嘉熙二年例行之

度宗咸淳二年太傅陳壽孫乞太學增試宏詞科是時王
應麟應鳳皆與選

真德秀奏舉遺逸趙蕃其畧曰臣等伏讀嘉定八年九
月辛未明堂大禮赦書內一項士人有節行才識學術

素爲鄉里推重不求聞達者委監司帥臣同加搜訪每
路一二人仍與本州長吏從來所爲事實所通學術
連銜結狀保明聞奏卽不以常才脩數委三省再加察
訪如所舉不妄特與擢用仰見聖朝網羅遺逸之意臣
等朝夕博訪期所以稱塞明詔之萬一竊見文林卽監
潭州南嶽廟趙蕃元祐故家學有源委識慮深遠節操
清高蚤歲得官臨事有立年踰四十卽上詞請隱居求
志垂三十載矣安貧處約澹然無營少工于詩晚益平
淡身雖閒退而愛君憂國之念未嘗少忘其在州里誘
掖後進一以孝弟忠信爲本蕃雖名在吏部然其行誼
學識素爲鄉曲所推不求聞達正應詔旨臣等既深知

其爲人又其家居適在所部庸敢輒以名聞伏望朝廷
更加察訪如臣等所舉不妄即乞特加旌擢以勵士俗
其於世教蓋非小補

衛涇奏舉布衣胡大壯其狀曰檢準嘉定五年近降指
揮方今收用人才非止一途然山林畎畝之間懷德抱
道不求聞達者豈無其人願俾監司守臣博加採訪具
以名聞無爲文具臣濫分符閫遠在湖湘欽承德音廣
求精選伏見潭州衡山縣布衣胡大壯故實文閣直學
士謚文定安國之孫右承務郎宏之子也抗志高遠制
行介潔自其少時已著孝友之稱既長受其祖安國之
學於父宏研究經術博通墳典其持論以明義利爲本

其立已以尚誠實為要冠歲學成即不事科舉隱居衡
嶽之下躬耕自給讀書自娛爵祿外慕一毫不以嬰其
心深藏固匿足跡未嘗至城市州縣官必禮於其廬然
後得見於是行成於身理於家信於鄉黨達於遠邇邦
人敬愛咸慕其道德尊之曰西園先生平生著述雖多
而封建論數篇尤為先達推重近時如前帥臣曹彥約
提舉樂章咸嘉其行相繼刻上本州以嶽鹿書院堂長
虛席嘗遣官吏以禮延致至今力辭未就臣觀其學識
節行足以師表後進蓋亦古之所謂逸民也臣竊聞孝
宗朝嘗有詔舉遺逸於是福建諸司芮彥等以魏拔之
之名來上則拔之自布衣召對賜第命為學官又嘗與

監察御史謝諤論郭雍之學皆本於易則雍自冲晦處
士加封頤正先生此皆近事彰彰在人耳目者矧自陛
下更化以來動遵孝宗成憲欲望聖慈特降膺旨下之
三省斟酌典故將大壯量才褒錄或畀之一命而授以
在外學官之職或錫之綸誥而假以處士之名庶幾山
林巖穴之棄材悉爲時用可以仰副陛下求賢致化之
意

按浙江通志杭州錢易錢彥遠紹興夏噩錢宇之温州
王景山陳寶之何勝實劉天益則以賢良方正直言極
諫舉杭州錢明逸錢藻李尚則以才識兼茂明于體用
舉杭州李執溫州王邵薛嘉言謝任鮑軻陳龜朋陳峴

處州王大方湯思退則以宏詞舉杭州陸邵之紹興王
俊則以詞學兼茂舉寧波王璧王應麟王應鳳紹興石
慶許蒼舒邢宜莫叔光岑全章一新錢揚祖徐執台州
趙澣金華許存禮徐淵則以博學宏詞舉紹興胡太初
孫嶸岑賢孫則以詞學舉寧波縵師臯處州葉稔王信
鄭汝諧項安世劉澹然則以教官舉湖州沈友直劉翥
周剔温州仰忻丁蕪夫張輝方燁蔡元康潘安固朱敏
功處州祝頰則以八行舉紹興張子俊張玘陳仲淳沈
信年張遜王蘭韓啓呂諒呂璠温州孔夢斗陳中庸萬
規處州徐仲吳銘則以經明行修舉朱戩胡混王弘顧
臨金華鄭祥徐佺趙崇俊應孟堅甘霖陳夢齋徐玘則

以明經舉而童子科又在外

遼道宗咸雍六年設賢良科詔應是科者先以所業十萬
言進 十年六月御永安殿策賢良

天祚帝乾統二年閏五月策賢良

金章宗大定二十九年上封事者乞鄉以八行貢春官設
制舉宏詞事戶部尚書鄧儼等謂成周鄉舉里選法卒
不可復設科取士各隨其時八行者乃亡宋取周禮之
六行孝友睦婣任恤加之中和爲八也凡人之行莫大
于孝廉今已有舉孝廉之法及民有才能德行者令縣
官薦之又制犯十惡奸盜者不得應試亦六德六行之
遺意也夫制舉宏詞蓋天子待非常之士若設此科不

限進士并選人試之中選擇之臺閣則人自勉矣上從其議 明昌元年三月初設應制宏詞科 二年設制舉有賢良方正能直言極諫博學宏詞達于從政等科 試無常期上意欲行即告天下聽內外文武六品以下職官無公私過者從內外五品以上官薦于所屬詔試之若草澤士德行爲鄉里所服者則從府州薦之凡試則先投所業策論三十道于學士院視其詞理優者委官以群經子史內出題一日試論三道如可則廷試策一道不拘常務取其無不通貫者優等遷擢之宏詞科試詔誥章表露布檄書則皆用四六誠諭頌箴銘序記則或依古今體或參用四六于每舉賜第後進士及在

官六品以下無公私罪者在外官薦之令試策官出題就考通試四題分二等遷擢之後衛紹王大安元年五月試宏詞科餘不多見其餘官上等遷兩官次等遷一官臨時取旨授之 承安二年三月始定保舉德行才能格 泰和元年上謂德行才能非進士科所能盡可通行保舉之制省臣奏在周禮大司徒以鄉三物教萬民而賓興之所謂萬民士農工商皆是也前代立賢無方如版築之士鼓刀之叟垂光簡冊者不可勝舉今草澤隱逸才行兼備者令謀克及司縣舉按察司具聞以旌用之既有已降令文矣上命復宣旨申之

元

世祖至元十八年詔求山林隱逸之士 二十三年遣侍
御史程文海訪求江南遺才 二十八年復詔求隱晦
之士俾有司具以名聞 時徵劉因爲集賢學士辭不
至因字夢吉容城人前徵爲右贊善大夫尋辭歸至此
復徵之因以疾固辭帝聞之曰古有所謂不召之臣其
斯人之謂歟遂不強致之

胡粹中曰劉因風節與嚴光相似然子陵羊裘釣水過
爲殊絕之行加足帝腹又失人臣之禮峻厲峭直不可
以爲法而靜修聞命即拜受任則辭進不失義退不違
禮卑不可踰高不過抗從容自然得賢人之高致者也
尚論元世遺逸靜修一人而已

高宗大德八年五月徵蕭燾赴闕命有司給以安車燾在
世祖時授陝西儒學提舉不赴累授集賢侍讀學士皆
不赴至大德十一年拜太子右諭德扶病入覲尋請去
職曰在禮東宮東面師傳西面今可行乎俄除集賢學
士國子祭酒固辭疾歸 九年詔求山林間有德行文
學識治道者

武宗至大四年完澤李孟等言方今進用儒者而老成日
以凋謝四方儒士有成材者請擢任國學翰林秘書太
常或儒學提舉等職俾學者有所激勸上曰自今勿限
資級果才而賢雖白身亦任用之

仁宗延祐元年正月勅各省平章爲首者及漢人省臣一

貞專意訪求遺逸苟得其人先以名聞而後致之 七
年詔曰比歲設立科舉以取人才尚慮高尚之士晦迹
丘園無從可致各摠其有隱居行義才德高邁深明治
道不求聞達者所在官司具姓名牒報本道廉訪司覆
奏察問以脩錄用又屢詔求言于下使得進言于上雖
指斥時政並無譴責往往采擇其言任用其人列諸庶
位以圖治功其他著書立言裨益教化啓迪後人亦斟
酌錄用著為常式

英宗至治三年拜住言前集賢侍講學士趙居信直學士
吳澄皆有德老儒請徵用之帝喜曰卿言適副朕心更
當搜訪山林隱逸之士遂以居信為翰林學士承旨澄

爲學士

泰定帝二年九月遣使宣撫諸道有晦迹丘園才堪輔治者具以名聞

文宗至順二年七月特命河南儒士吳炳爲藝文監典籍順帝至正三年徵處士脫因伯顏張瑾杜本惟本不至本在武宗時常被召至京師即歸隱武夷山下文宗聞其名徵之不起至是脫脫薦之召爲翰林侍制兼國史院編修官使者趣至杭州稱疾固辭且致書丞相曰以萬事合爲一理以萬民合爲一心以千載合爲一日以四海合爲一家則可以言制禮作樂而躋帝王之盛矣七年正月召隱士完者圖執禮哈琅爲翰林侍制張樞

董立爲翰林修撰李孝先爲著作郎張樞不至 十二
年二月徵達寧處士彭炳爲端本堂說書不至 十五
年召徽州隱士鄭玉爲翰林侍制不至

許約曰科舉之法實始于隋唐後世因之而科舉益盛
然科舉與辟舉之法並行故唐之人才爲盛然房杜裴
郭諸公未必盡出于科目也宋起孫明復于泰山而處
之胄監拔蘇洵于眉山而進之容臺擢程頤于西洛而
寘之講筵所以尊尚有德自足以聳動天下而人才之
盛職此之由若罷薦舉獨行科舉之法命有司以防奸
欺設邏卒以檢懷挾功名之士不拘小節固不以爲嫌
彼恬退高蹈之士必不屑就大抵科目固足以得士亦

豈能盡得天下之賢中人以下之資可以利誘若學際
天人道全體用者安肯決榮辱于三場競是非于寸晷
哉當于科目之外別立薦舉之法若學行兼備肥遯林
泉不求聞達不屑科目者聽所在保舉待以不次夫如
是不徒有以獎拔恬退而野無遺賢之美溢於唐虞矣
元時以徵授官者劉因蕭澗吳澄之外尚有數人

許衡

中統間徵授
懷孟路教官

李治

中統間徵授
翰林學士

趙孟頫

至元中以程文海
薦擢兵部郎中

徐琰

至元中以王磐薦拜
浙江肅政廉訪使

趙宏偉

至元中以董士桓
薦拜浙江廉訪使

袁桷

大德間以關復程文海
王滿薦為翰林檢討

按浙江通志元徐元德胡崖以賢良方正直言極諫舉

皆金華人

皇明

國初令有司保舉人材即古鄉舉里選之遺意 累朝下
詔亦必及之其事例備載于後

凡各府州縣每歲於所轄隔廂鄉都內拔選容止端謹
無過人材一名申送布政司考覈轉行按察司覆考堪
充歲貢開坐考過詞語差人送部應有賢良方正及山
林巖穴隱逸之士并通曉經書儒士秀才孝廉俱各訪
求到官審無過犯違碍不拘名數差人伴送到部或內
外官員人等薦舉人材秀才即便行移原籍官司起取
赴部如儒士秀才出題考試果否通經賢良隱逸等項
人材量其才能定其高下仍取本戶丁糧數自作何營

生及戶內有無雜役事故供結明白然後開發送部選用如將鄙陋不堪之人一槩朦朧濫舉原舉官吏依貢舉非其人律問罪

太祖洪武庚子六月遣使徵宋濂劉基章溢葉琛至金陵帝問陶安曰四人者何如安曰皆臣所不及也帝

嘉其善讓 元年九月 詔起懷才抱德隱于巖穴之士遣夏原吉詹同魏觀吳輔趙壽等分行天下訪求賢才 十一月癸亥以 手詔召劉基 二年十月以方

克勤爲寧海訓導克勤樂于育才負笈求從者甚衆克勤據經陳義聞者悅服 四年閏三月 召永豐劉于至初于嘗以賢良徵因病謝歸及是復召至便殿 諭

曰君子爲學當見於世用朕將官之干曰臣在前朝嘗
應進士舉試南宮不利今幸逢有道之朝凡有氣血
者咸思效用但臣年齒已衰恐負天恩敢辭特賜
還山十一月召宋濂爲禮部主事六年五月
命禮部訪求賢士於天下上曰古之聖王恒汲汲於
求賢若高宗之於傳說文王之於呂尚二君者豈其智
之不足而遑遑於版築鼓刀之徒實以天下之大非人
君之所能獨理而賢才不備不足以爲治也今山林之
士豈無德行文藝之有足稱者宜今有司以禮起送至
京朕將任用之以圖至治是年罷科舉專用辟薦
其目有明經行修有懷才抱德有賢良方正有人材有

孝廉鄉舉于 朝而各省貢士皆卒業太學以次除用

蓋罷進士之科者十有餘年時既不喜文士又以初立
辟薦法行之甚嚴每舉者至京 上親校閱不稱 旨

輒坐舉主徃徃有謫戍者至洪武十五年復開科今圖
列諸狀元姓名有洪武九年張顯宗謬矣 七年八月

上御武樓宋濂侍問曰天下雖定朕猶垂意宿學之
士卿知其人乎濂對曰會稽有郭傳者雖寄跡釋氏誠

一代奇才也 上領之未幾復召濂曰郭傳之文卿可
持至乎濂以其文進 上覽之曰誠如卿言即 召見

俾日侍左右以脩顧問傳精白一心凡可以獻替者咸
無隱情擢爲翰林應奉陸起居注遷考功丞 九年五

月 上御奉天門謂宋濂等曰自古有國家者必資賢才以共理秦之時張良陳平韓信皆隱屠釣漢興乃用以成帝業今山林巖穴豈無超拔之才何以能羅而致之濂對曰取士莫善於選舉用人莫善於器使命官莫善于乂任 陛下行此則人才皆效用矣 十年九月

勅諭浙江温州府訪求師儒 十二年十二月 詔

徵天下博學老成之士先是 上謂禮部曰爲國得賢不如薦賢朕自臨御以來十有二年思得賢士以熙庶績然博學老成之士匿德藏光甘於窮餓不肯輕出宜下有司悉心推訪禮送于 朝朕將顯用之至是皆至京師時江西布政使沈立本遣人招故元吏部侍郎伯

顏子中子中飲鴆死子中西域人祖父仕江西因家焉
通春秋五領鄉薦授東湖書院山長陞建昌路儒學教
授尋爲江西行省都事陳友諒兵陷贛州子中招募壯
士欲復城不克間道入福建行省子中出奇計收復建
昌遂浮海獻捷元都授福建行省郎中累遷至吏部侍
郎出使廣東比至未幾而廣已歸附子中墜馬求死不
得拆其一足於是子中變姓名浪跡於江湖間往來居
進賢之北山先是其妻子已爲江西叅政楊憲送京師
朋友有弔之者子中荅曰吾身且不有奚暇顧妻子哉
於是周游天下誓不復仕悲歌慷慨未嘗一日忘于元
也嘗懷鴆自隨曰如有強我者便當以死荅之郡縣聞

而義之不之強至是立本專使招之子中見使者慨然
曰吾今死亦晚矣乃具牲酒祭其祖父師友作歌七章
飲鳩而死 詔徵寧國府訓導陳廸爲翰林編修 十
三年二月 詔舉聰明正直孝弟力田賢良方正文學
術數之士 十五年九月吏部以經明行修之士鄭輅
等三千七百餘人入見 上諭之曰朕自即位以來側
席賢士與圖至治然自古知人堯舜所難豈所知者皆
賢所未知者無賢哉故 勅天下徵聘遺逸卿等固皆
賢人君子山林之下又豈無卿者其悉舉以爲朕用於
是濟寧單縣儒士張寧以董倫等薦復遣使徵之仍
賜輅等鈔人一錠 十一月徵者儒鮑恂等四人至京

師先是禮部主事劉庸薦鮑恂余詮全思誠張長年皆明經老儒達於治體可倚顧問遣使召至 上見之喜

賜坐顧問 命爲文華殿大學士恂等以老疾固辭

上諭之曰以卿等年高故授此職輔導 東宮免卿

早朝日晏而入從容侍對不久當聽卿等致仕庶不負

卿等平生所學卿何辭焉恂等復固辭尋 賜還鄉里

十七年令各布政司直隸府州縣舉秀才人材必由

鄉舉里選知州知縣等官會同境內耆宿長者訪求德

行聲名著于州里之人先從鄰里保舉有司再驗言貌

書判方許進呈若不行公同精選者坐以重罪 三十

五年 詔山林隱逸懷才抱德之士有司詢訪以禮敦

請赴京量才擢用其有志尚閒逸不願出者具名來

奏 十八年十二月丙午 詔舉孝廉之士 十九年

七月 詔舉經明行修練達時務之七年七十以上者

郡縣禮送京師 上諭禮部郎中鄭居貞曰古之老者

雖不任以政至於咨詢謀謨則老者閱歷多而見聞廣

達於事情周於物理有可資者居貞對曰人至六十精

力衰耗則不能勝事請六十以上者不遣 上曰正爲

此來有司不體朕意士有者年便置不問豈知老成古

人所重文王用呂尚而興穆公不聽蹇叔而敗伏生雖

老猶足傳經豈可槩以耄而棄之也若年六十以上七

十以下者當置翰林以備顧問四十以上六十以下者

則於六部及布政使司按察司用之 二十二年十二月徵士梁寅卒寅字孟敬臨江新喻人世業農家貧力學通六經之首累舉于鄉不第遂棄舉業一時名士多與之交元爲集慶路儒學訓導以親老辭歸時天下兵起遂隱居教授及我 明興徵天下名儒修述禮樂寅就徵已六十餘矣時以禮樂制度分爲三局寅在禮局中討論精審諸儒推服書成將授以官寅以老病辭歸結屋石門山四方士多從之學者稱爲梁五經至是卒年八十二所著有周易叅議詩書演義周禮考註春秋考義及漢唐以來君臣事畧宋元史節要及石門集三十一一年八月 建文帝徵江西處士楊士奇克實錄

編纂官尋授 齊府審理副仍招編纂 十二月令內

外群臣各舉山林巖穴懷材抱德之士 又 詔舉優

通文學之士以處士唐愚士爲翰林侍讀

按 太祖自立國時省臺要地俱以勲舊充之其所聘用如劉誠意宋文憲輩雖禮遇優崇而頗循資序自胡陳之後群臣鮮當意者法網嚴密誅斥相繼而學士大夫亦多所引避於是不愛高爵越資以收天下之賢俊而有朝徒步暮金紫者永樂中亦間行之

洪武初徵儒士王本杜敷趙民望吳源爲四輔官兼太子賓客位尚書上賢良郭允道秀才范敏曾泰爲戶部尚書稅戶人才義門鄭沂爲禮部尚書儒士趙翥爲工

部尚書武英堂紀事監生黃義爲湖廣行省叅政儒士
張子源試禮部右侍郎張宗德試兵部右侍郎耆儒劉
靖關賢爲諫院左右司諫兼左右春坊左右庶子趙肅
何顯周爲左右正言兼左右諭德儒士藍子貞張伯益
爲都察院左右副都御史陳玄爲右僉都御史明經張
文通阮仲志試左右僉都御史人才赫從道試大理寺
右少卿孝廉李德爲南京應天府府尹儒士吳顯爲國
子祭酒稅戶義門鄭濟王勲爲春坊左右庶子賢良孟
性賢爲廣西左叅政文學宋亮爲福建左叅政儒士邢
浩爲河南盧友常爲山東濟瞻爲四川俱左布政使金
良佐爲廣東吳昭爲山西陳宗顏爲陝西俱右布政使

又鄒伯源等十一人爲各布政司叅政叅議張璉爲陝西左布政使 處善爲湖廣徐子民爲山東曹岱爲浙江梁伯與爲河南彭友信爲北平韓宜可爲山西李宜之爲江西俱右布政使國子監生劉政鄧志和爲福建左右類鈍申遠爲北平左右周震張璉爲河南左右王允陳嘉爲山西左右薛郁董倫爲陝西左右俱布政使楊允爲浙江楊鏞爲山東方溫爲湖廣俱右布政使龍鐔爲浙江阮友章爲福建王禮爲北平李皓爲山西曲能爲山東俱按察使蕭禮敬等二十五人爲左右叅政叅議朱源等二十一人爲副使僉事其一時銓補乃爾豈空印事發藩臬諸臣俱得罪耶留守中衛指揮僉

事陳煥子信試四川左叅議官舍鳳陽留守中衛指揮
僉事韓春子恕試右叅政駙騎右衛千戶俞清弟立以
軍餘試廣東左叅政府軍左衛千戶陳亨弟貞以軍餘
試右叅政人符董從先魯昉楊仲禮署浙江王守政蔡
均美謝直方王彙彛署福建俱布政司官 四年京畿
鄉試以前元貢士鮑恂與學士宋濂等同爲考試官

成祖永樂元年 勅內外諸司文職官員各舉所知或堪
重任或沉滯下僚或可剗繁而優游散地或抱道懷才
隱居田里無問遠近並舉以聞 初 詔修 高廟實
錄布衣陳濟與學士解縉等爲總裁而禮部尚書李至
剛及講讀以下僅爲纂修官 又以人材馬麟爲湖廣

盛儀爲浙江俞景周爲山東周克敬爲廣西俱左布政使孫豫爲山西江潤爲河南艾英爲浙江俱右布政使吳衡等六人爲叅政叅議 五年六月 勅張輔沐晟劉儁訪求交趾人才禮送赴京擢用 十月以交趾所舉明經士人甘潤祖等十一人爲諒江等府同知 賜勅慰勉

仁宗洪熙元年 詔民間有行己廉正才堪撫字者許見任官具實舉薦

宣宗宣德七年 詔各處有文學才行出衆之士自二十歲以上今所在有司保舉赴京選用 八年 詔各布政司按察司府州縣官連名舉保賢良方正一人起

送吏部量才擢用

英宗正統十四年 詔各處舉到儒士照永樂年間事例
送翰林院嚴加考試選用不中者發原籍爲民

景皇帝景泰三年 詔各處見任官員果有才行政事優
長拘於資格屈在下僚及有文學才行堪授職任之士
隱於民間及官員罷職委無賊犯重情而才學可用者
並聽在內四品以上官員在外巡撫巡按方面并各府
州縣正官指陳實跡薦舉赴京考用所舉之人後犯賊
罪連坐舉主

英宗天順元年 詔處士中有學貫天人才堪經濟隱居
高蹈不求文達者所司具實奏聞 五年令天下有才

兼文武或學行異等或謀勇出衆者許所在官司具實
奏聞

憲宗成化十九年九月授吏部聽選舉人陳獻章爲翰林
檢討獻章廣東新會人巡撫廣東都御史朱永等薦其
學行可以追匹古人乞以禮徵聘吏部謂獻章乃聽選
舉人非隱士比遂移文取至京欲考試職事獻章奏言
臣以舊疾未平未能就試母年七十有九乞放歸侍養
上特授以翰林檢討聽歸一時推尊之目爲道學

二十年三月徵處士吳居仁尋卒居仁字叔心江西餘
干人自幼穎異有大志嚴毅清苦澣養體驗慨然以斯
道自任所著居業錄敬齋集

孝宗弘治十年令府州縣正官保舉山林隱逸之士懷才抱德經明行修衆所推服者許巡按及布按二司官覈實奏送吏部量才擢用如所舉不當保勘官員一體叅究時有儒士潘辰以廷臣薦授翰林待詔歷官太常寺卿

世宗嘉靖二年生員文徵明以巡撫薦八年儒士葉幼學以輔臣薦俱授待詔

穆宗隆慶三年祭酒姜寶題請舉人中如有孝友睦嫻名實相孚不分己未坐監許撫按官會薦遇有兩京博士之缺酌量推用于是四川舉人趙蒙吉南直隸張弘道陝西呂潛袁楨等俱薦授國子學正等官

按霍韜曰 國初用人薦舉爲重貢舉次之科舉爲輕
今則科舉爲重貢次之薦舉不行矣故有行同盜跖心
劣商賈者能染翰爲文俱隸仕籍此風所以益偷也

國朝優禮處士其以禮自處者無過於陳靜誠遇吳康齋
與弼武學士周文而已陳在 高帝初應聘與參帷幄
大計再授翰林院學士辭授禮部侍郎尚書左丞又辭
竟以處士卒遣中官 諭祭官爲購葬有子枋以遇故
特擢累官至尚書武在 文廟初以 藩邸講讀之舊
驛召至京 賜襲衣銀帶鞍馬以爲翰林侍講學士固
辭聽以學士致仕 賜勅及白金文幣酒餼馳驛歸
吳在 英廟時徵時石亨用事邀名飾過其門客謝昭

倣張甯教蔡京招楊時故事勸以薦士亨從之因見李
賢說山林隱士有撫州吳與弼者乃司業吳溥之子以
學行名天下亨慨然代爲草奏上之 上召賢問曰吳
與弼如何賢承亨意對曰與弼儒者之高蹈自古聖帝
明王莫不好賢下士徵聘隱逸若 陛下行此一事實
本朝盛舉 上遂 命行人聘之越五月徵至京

上謂李賢曰與弼當授以何職賢對曰今 東宮講學
宜授 宮僚次日 召吏部 命爲左諭德朝士皆驚
以布衣召至一旦授此與弼疏辭 上召入文華殿問
曰特聘爾來何不就職與弼對以老疾 上曰宮僚亦
優閒不必辭 賜以文綺羊酒薪米 命太監牛玉送

至館務今就職與弼具疏固辭 上復召入 文華殿

賜 勅褒嘉資以銀幣允其所辭與弼疏陳十事 上

命有司月給俸米以贍終身仍 命行人送歸與弼復

上表謝 恩而去 漳州布衣陳真晟詣 闕上程朱

正學纂要不報真晟初治舉子業赴省試聞有司防察

過嚴無待士禮乃辭歸自是不復科舉務為主敬誠意

之學至是詣 闕上書不報乃聞吳與弼名欲往見之

行至江西見編修張元禎元禎謂曰濂洛之學自有真

傳如與弼者不可見亦不必見也遂歸尋卒

國初徵薦姓名

制科姓氏庠序有碑賢書有錄足垂不朽矣惟徵薦之

在國初者歲月滋久掌故無徵余恐其愈遠而愈湮也姑即其宦蹟顯著者詮次于左以備參考

宋濂浙江浦江人洪武初徵聘二年任學士謚文憲

劉基浙江青田人國初徵用洪武元年拜御史中丞

無太子贊善大夫三年授弘文館學士封誠意伯

四年歸田

章溢浙江龍泉人國初徵用元年拜御史中丞無

太子贊善二年守制

吳沉金華人洪武中薦舉任東閣大學士

宋訥滑縣人洪武中薦舉十五年任文淵閣大學士

黃蕭洪武初薦舉五年任工部尚書

陳世舉應天上元人洪武初薦舉五年任太常卿

趙名重洪武初薦舉八年任太僕卿

陶凱浙江天台人洪武初由薦舉官禮部尚書五年出湖廣叅政後以罪廢

宋德潤直隸泰興人由薦舉洪武六年任吏部侍郎

任源山西武鄉人由薦舉洪武十三年任吏部右侍郎

韓膺山東平度人由薦舉洪武十四年任吏部左侍郎

陳敬洛陽人洪武初以行義舉十六年由侍郎試吏部

尚書本年年坐累死

陳洽直隸武進人洪武中由薦舉永樂十三年任兵部

左尚書後征黎賊卒于師謚節愍

孫瑜四川犍爲人洪武中薦舉永樂元年任戶部左侍郎

曹洪湖廣襄陽人洪武中薦舉永樂十一年任戶部右侍郎

陳山福建沙縣人洪武中薦舉洪熙元年任戶部左侍郎

楊思濟河南歸德人洪武初由薦舉六年任禮部右侍郎九年免

劉嘉議洪武初由薦舉十四年任禮部左侍郎十七年免

張子源洪武初由薦舉十五年任禮部右侍郎本年免

王志直隸藁城人洪武初由薦舉十七年任禮部右侍郎十八年免或云伏誅

蔣源洪武中由薦舉革除元年任禮部右侍郎二年免李琦直隸元氏人洪武末由薦舉宣德元年任禮部右侍郎二年出使安南改湖廣右布政使卒于途

章祥洪武初薦舉十八年任禮部左侍郎

鮑恂崇德人洪武中薦舉十六年拜文華殿大學士未任辭

全思誠上海人洪武中薦舉十六年拜文華殿大學士尋以疾辭

余詮安吉人洪武中薦舉十六年拜文華殿大學士未

任辭

張長年高郵人洪武中薦舉十六年拜文華殿大學士
未任辭

陳則崑山人洪武初薦舉八年任戶部左侍郎

魏鑑洪武初由薦舉任禮部右侍郎

李榮直隸清苑人洪武初由薦舉五年任兵部右侍郎

商英河南陳留人洪武初由薦舉六年任兵部左侍郎

趙圭玉浙江山陰人洪武初由薦舉七年任兵部右侍

郎

張易河南鄆陵人洪武中由薦舉十四年任兵部右侍

郎十七年致仕

俞綸洪武初由薦舉十七年任兵部尚書

蘭選山東博興人洪武中由薦舉十八年任兵部左侍郎二十年免

郭良陝西華陰人洪武中由薦舉二十三年任兵部左侍郎

許濂山東濰縣人洪武中由薦舉二十五年任兵部左侍郎

葉鞅洪武中薦舉二十七年任兵部右侍郎二十八年免

徐宗實浙江黃巖人洪武中由薦舉革除二年任兵部右侍郎四年死靖難

崔衍山東膠州人洪武末由薦舉永樂十八年任兵部

右侍郎二十二年調四川右布政

張仁由薦舉洪武元年任刑部侍郎

左安善洪武初由薦舉二年任刑部侍郎三年調河南

知府

黃欽洪武初由薦舉六年任刑部左侍郎本年免

李浩山西曲沃人洪武初薦舉七年任刑部左侍郎本

年使琉球

臧哲山東諸城人洪武初薦舉八年任刑部左侍郎九

年陞四川行省叅政

趙毅河南汝陽人洪武末薦舉永樂二年任工部左侍

卽七年調交趾

劉昱山東武城人洪武中薦舉二十年任右通政

何懷輝湖廣桂陽人洪武初薦舉二十五年任通政司

左參議

鄒魯盱眙人洪武中薦舉二十年任大理寺丞

商敬洪武初薦舉十九年任太僕卿

陳援烏程人洪武中薦舉二十一年任大理右寺丞

翁銘壽州人洪武中薦舉二十七年任太僕卿

樂禮全椒人洪武初薦舉十二年任太常卿

王希哲洪武初薦舉十五年任刑部右侍郎十六年伏

誅

葛修洪武中由薦舉十七年任刑部左侍郎十八年伏

誅

周邦洪武中薦舉十七年任刑部右侍郎本年免

邵質洪武中薦舉十七年任刑部右侍郎十九年免

徐文顯洪武中薦舉十七年任刑部右侍郎十八年免

謝祥洪武中薦舉二十一年任刑部右侍郎本年免

黃紹祖洪武中薦舉二十二年任刑部右侍郎二十三

年免

祁鑑洪武中薦舉二十三年任刑部右侍郎二十五年

免

李似初洪武中薦舉二十四年任刑部左侍郎二十六

年免

周志清洪武中薦舉二十五年任刑部右侍郎二十七

年免

蔣毅浙江長興人洪武中薦舉二十七年任刑部左侍郎
卽革除二年調浙江按察使

楊泰直隸山陽人洪武中薦舉永樂五年任刑部右侍郎
卽本年卒

張允文由薦舉洪武元年任工部侍郎

梁詵陝西開城人由薦舉洪武六年任工部右侍郎八
年出守廬州府

韓鐸河南太康人由薦舉洪武十七年任工部左侍郎

十八年免

孟維新山東博興人由薦舉洪武二十六年任工部右侍郎

王文質河南內鄉人由薦舉洪武三十一年任工部右侍郎

張曷浙江慈谿人由薦舉洪武三十一年任工部左侍郎出爲北平左布政使死難

魏澤溧水人洪武中薦舉二年六年任刑部尚書謫寧海典史

趙和洪武中薦舉二十一年任大理卿

陳晟寶應人洪武中薦舉二十三年任大理左寺丞

劉龍吉水人洪武初薦舉十三年任戶部右侍郎

聞良輔德清人洪武中薦舉三十一年任大理右少卿
胡閔潘陽人洪武中薦舉建文三年任大理寺右少卿
四年死靖難

蘭芳山西夏縣人洪武中薦舉永樂十年由工部主事
推工部右侍郎十五年卒

胡鉉洪武初薦舉三年任弘文館學士六年致仕

王永壽山西太原人洪武中薦舉正統十三年任工部
右侍郎

曾秉正山東萊州人洪武初由薦舉十年任通政使十
五年削籍腐刑

睢稼洪武初薦舉歷中書省叅政三年任弘文館學士
尋致仕

來徵洪武中由薦舉二十八年任通政使

李仕魯山東濮州人洪武初由薦舉十四年任通政使
十六年忤旨死

薛崑河南閔鄉人洪武中由薦舉革除四年任大理卿
永樂二年謫廣西

呂震陝西臨潼人洪武中由薦舉永樂二年任大理卿
耿通山東齊魯人洪武中由薦舉永樂四年任大理卿
出使安南後坐奸黨死

趙仁山東寧海人洪武初由薦舉十八年任兵部尚書

藍子貞江西吉水人由薦舉洪武十七年任左副都御史
史本年免

齊魯河南嵩縣人由薦舉洪武二十年任左副都御史
李鎬山東清平人薦舉洪武二十六年任右副都御史
鄭楚瞻浙江崇德人由薦舉洪武二十一年任右副都
御史革除中免

茅大方直隸太興人洪武中由薦舉革除元年任右副
都御史四年死靖難

紀著直隸開州人由薦舉洪武十六年召任右僉都御
史尋乞致仕

高翼山東棲霞人由薦舉洪武十七年任左僉都御史

十九年卒

元善由薦舉洪武十七年任右僉都御史十八年免

劉文進山東鄒平人由薦舉洪武十八年任左僉都御

史二十年免

夏長文直隸上海人由薦舉洪武二十三年任左僉都

御史本年免

溫原直隸樂亭人由薦舉洪武二十四年任左僉都御

史二十五年免

祝春蒲州人洪武中薦舉二十五年任少詹事兼侍講

李文吉洪武中薦舉二十五年任少詹事兼侍講改左

僉都御史

周彥奇吉水人洪武中薦舉永樂十五年任大理少卿
祁著洪武中薦舉二十六年任戶部左侍郎

董子莊臨川人洪武中薦舉永樂十年任司業

李欽直隸邢臺人由薦舉洪武二十六年任左僉都御
史

周顛山東安丘人由薦舉洪武三十年任右僉都御史
本年免

韓焯洪武初年薦舉八年任戶部尚書本年免

宋冕洪武初年薦舉八年任戶部尚書本年免

周斌洪武初薦舉九年任戶部尚書十年致仕

沈立本洪武初年薦舉十年任戶部尚書十一年陞山

西布政卒於官

顧禮蘇州崑山人洪武初徵舉十二年任戶部尚書本年免

任彬洪武初年薦舉十二年任戶部尚書十三年免

徐鐸江西豐城人洪武初年薦舉十三年任戶部尚書
本年免後起山東布政使卒於官

劉平仲洪武初年薦舉十三年任戶部尚書本年免

徐恢浙江常山人洪武初年薦舉十四年任戶部尚書
本年下獄 命減死論

曾泰洪武初由薦舉十五年任戶部尚書本年免

王肯洪武初年薦舉十五年由刑部尚書改任戶部尚

書十七年免

陳迪直隸宣城人洪武乙卯薦舉三十一年任禮部尚書革除四年靖難族誅

高信浙江義烏人洪武中薦舉十五年任禮部尚書本年致仕

何禮直隸清苑人洪武初年薦舉十五年任兵部尚書十六年免

王道亨洪武初薦舉十八年任戶部左侍郎

馬麟直隸大名入洪武中薦舉二十四年以大理寺丞署兵部尚書事本年回寺

劉惟謙吳元年薦舉洪武四年任刑部尚書本年調四

川行省叅政六年再任七年免

孫堯洪武初年薦舉六年任刑部尚書本年調四川行省叅政後坐事免

邢懋山東武定人洪武初年薦舉十年任刑部尚書本年免

王惠迪洪武中薦舉十七年任刑部尚書十八年坐法暴昭山西浮山人洪武中薦舉三十一年任刑部尚書建文元年充北平採訪使四年靖難師入京被執以節死

侯泰直隸南和人洪武中薦舉華除二年任刑部尚書四年靖難師起被執以節死

王大中洪武中薦舉三年任弘文館學士本年致仕

潘孟舉陝西澄城人洪武中薦舉二十年任工部尚書

二十二年免

楊士奇名寓以字行江西廬陵人由薦舉換審理副洪武三十五年為翰林編修永樂五年以左諭德輔

東宮正統九年以少師華蓋殿學士卒年八十

朱升直隸休寧人國初薦舉洪武元年任學士三年

致仕

劉三吾湖廣茶陵人洪武初薦舉十八年任學士三十

年下獄賜死

鄒瑾江西永豐人洪武中薦舉章除二年任大理右寺

丞四年死靖難

遠志洪武中薦舉永樂四年任大理左寺丞

劉辰金華人洪武中薦舉永樂三年任刑部左侍郎

董倫順天宛平人由薦舉洪武三十一年以禮部左侍

郎兼任學士建文四年致仕

王景彰浙江松陽人由薦舉建文元年以禮部右侍郎

兼任學士四年 文皇卽位 命專爲學士六年卒

於官

李柝山西壺關人由薦舉洪武十五年任侍講學士遷

浙江右布政使

高巽志直隸蕭縣人由薦舉洪武三十一年任侍講學

士遷太常少卿

方孝孺浙江寧海人洪武中薦舉建文二年任文學博

士即講靖難後抗節死

王達直隸無錫人洪武中薦舉永樂元年任侍講學士

三年卒

喬隱山東章丘人洪武末薦舉永樂元年任刑部左侍

郎

朱逢吉崇德人洪武中薦舉建文四年任大理右寺丞

永樂元年卒於官

戚遜洪武中薦舉建文四年任大理右寺丞永樂元年

陞山東叅政

費震江西都陽人洪武初年徵賢良十一年任戶部尚書十二年陞湖廣布政使致仕

夏恕河南洛陽人洪武中舉賢良二十八年任刑部尚書三十一年免

嚴震直浙江烏程人洪武庚午舉賢良二十六年任工部尚書二十七年降御史歷都察院右都御史三十年再任本年致仕建文四年巡撫山西卒

岐亨山西解州人以賢良方正舉洪武十九年任右副都御史

周均德四川宜賓人以聰明正直舉洪武九年任工部右侍郎十二年免

詹同直隸婺源人 國初以文學徵洪武四年任吏部

尚書六年加學士承旨兼吏部尚書七年致仕

吳琳湖廣黃崗人 國初以文學徵洪武六年任吏部

尚書七年以老致仕

高啓直隸長洲人洪武二年由文學徵三年自翰林編

修陞戶部侍郎未任辭歸

杜智蕪湖人洪武中舉文學永樂二十二年任南京左

都御史

呂復江西興國人洪武初徵文學五年任太常卿

曾魯江西新淦人洪武初以文學徵修元史五年任禮

部侍郎本年致仕

許存仁浙江金華人洪武初以文學徵吳元年任祭酒
洪武元年被劾去

門克新陝西秦州人洪武中舉文學任禮部尚書卒于
官

王克已山西壽陽人洪武中薦文學十三年任吏部尚
書十四年致仕

阮峻浙江仁和人洪武初年舉文學十三年任吏部尚
書十四年致仕

李敬直隸江都人一名鴻漸洪武元年舉文學六年任
刑部尚書本年致仕後起國子祭酒罪免

馬京陝西武功人洪武中舉文學未幾元年任刑部左

侍郎

冀凱河南鹿邑人以文學貢洪武二十七年任工部左

侍郎

杜澤山東沂水人洪武中舉文學二十九年任吏部尚
書三十一年以年老致仕

郭允道陝西安塞人洪武初年舉文學十五年任戶部
尚書本年免

劉仲質江西分宜人洪武初年舉文學十五年任禮部
尚書本年改 華蓋殿大學士降監察御史致仕

周湏江西鄱陽人 國初舉文學洪武三年拜刑部尚
書初入官責胥吏貶惠州府經歷

張道經山東蒲臺人洪武初舉文學十八年試戶部右侍郎本年改大理卿

范俊湖廣大冶人舉文學洪武二十八年任右僉都御

史

張紳直隸貴池人以文學舉洪武十六年任右僉都御史十七年免

魏觀湖廣蒲圻人國初以文學舉洪武三年任祭酒四年坐視禮不以時奏論

王起東浙江上虞人洪武中以文學舉二十三年試禮部侍郎二十四年免

易英湖廣澧州人洪武末舉文學十六年任禮部右侍

郎十七年卒

秦約直隸崇明人洪武初以文學舉四年任禮部侍郎
本年致仕

陳昱洪武初年舉才能十二年試任吏部尚書十三年
免

詹徽同子洪武中舉才能十八年以左都御史 命兼
吏部尚書二十四年坐藍黨誅死

盛无輔 國初薦才能洪武七年任吏部尚書八年免
陳穆浙江烏程人洪武中舉文學永樂四年任大理左
寺丞

馮舉舉才幹任南豐典史洪武二十四年上言五事擢

左僉都御史

李敬臣陝西鳳翔人洪武初舉人才六年任刑部侍郎
七年免

張文昱應天上元人洪武中舉人才十八年任刑部右
侍郎十九年免

楊翼安直隸靈璧人舉人才洪武元年任工部侍郎二
年出爲河間知府

湯有恭懷遠人洪武中以人才舉十七年任右都御史
封益 國初舉人才任戶部右侍郎

王儁舉人才洪武二十七年任工部左侍郎

馮天孫浙江歸安人舉人才洪武三十年任工部右侍

郎以病乞休

邊昇山東歷城人舉人洪武三十一年任工部右侍

郎本年免

甄庸順天宛平人洪武中舉人二十二年任工部尚書宣德二年致仕

蔣廷瓚直隸滑縣人洪武中舉人行永樂七年任工部右侍郎十一年出爲貴州左布政使

陳瑛直隸滁州人洪武末由人舉革除四年任左副都御史永樂元年任左都御史十年下獄死

藥理舉人洪武十七年任右僉都御史本年免

蘇瓚河間人洪武中舉人永樂十六年任工部右侍

郎

戴瑀廣東海陽人舉人才洪武二十三年任左僉都御史二十四年免

劉士英河南洛陽人舉人才洪武二十三年任右僉都御史二十四年免

劉倫舉人才洪武二十五年任右僉都御史二十六年免

李敘荆名鎬江西崇仁人洪武初舉人才二十一年任祭酒

劉滄舉人才洪武二十七年任右僉都御史二十八年免

王平四川新繁人舉人才洪武二十七年任左僉都御史

嚴德明舉人才洪武二十八年任左僉都御史

司中舉人才洪武三十年任左僉都御史

周璿山東諸城人舉人才洪武三十一年任左僉都御史

朱從善直隸泗州人 國初舉人才四年任戶部侍郎
向志仁洪武初舉人才十三年任戶部右侍郎

傅鐸直隸內黃人 國初舉人才十三年任戶部左侍郎

陳居敬直隸蒙城人舉人才二十七年任戶部左侍郎

郭任直隸丹徒人洪武中舉人才三十四年任戶部侍郎死難

盧迥浙江仙居人洪武中舉人才三十四年任戶部右侍郎死難

張炳山西澤州人洪武中舉人才二十六年任禮部右侍郎二十八年轉左革除元年改北平左布政被執而死

吳景玄浙江括蒼人洪武中舉人才元年任禮部侍郎本年致仕

何禮直隸清苑人洪武初舉人才十五年任兵部尚書徐銘直隸丹徒人洪武中舉人才七年任兵部右侍郎

郁新直隸臨淮人洪武中以人才徵二十六年任戶部尚書三十一年開建文四年起復三年卒

楊訓文四川潼川人洪武初年舉人才四年任協陶凱理禮部事六年改戶部尚書

董俊山西太原人洪武初年舉人才十二年任兵部尚書十三年致仕

劉昭先洪武初年舉人才六年任協牛諒理禮部尚書事七年罷

馮諒直隸興化人洪武初年舉人才十一年任刑部尚書十二年免

劉達河南項城人洪武初年舉人才十七年任刑部尚

書本年免

李敏直隸潁州人洪武初年舉人才六年任工部尚書
七年陞江西行省叅知政事九年再任本年卒

王虎洪武初年舉人才九年任工部尚書十二年免

余文昇直隸丹徒人洪武初年舉人才十二年任工部
尚書十三年免

彭祥洪武中舉人才十七年任左都御史

李寅即文仲洪武十二年舉人才任工部左侍郎

安信洪武十五年舉人才任工部右侍郎

高寧舉人才洪武十五年任工部左侍郎

趙俊洪武初舉人才十五年任工部尚書十七年免

徐本江西人洪武初舉人才十八年任工部尚書二十年免

彭與民江西萬安人洪武中舉人才三十年任大理寺左寺丞章除四年監軍被害一云名與明

李禎山東丘縣人洪武中舉人才十八年任工部左侍郎

李端洪武中舉人才十七年任戶部右侍郎

郭桓洪武中以人才舉十七年任戶部左侍郎

湯仲行浙江歸安人洪武中舉稅戶人才二十七年任

吏部右侍郎

嚴良奇浙江長興人洪武中舉稅戶人才三十年任刑

部左侍郎爲民永樂元年復任

潘長壽浙江長興人舉稅戶人才洪武三十年授右僉都御史本年以直諫出知南雄府致仕

陳樞浙江奉化人洪武初舉明經二年任直學士

錢唐浙江象山人洪武元年以明經任刑部尚書

鍾永浙江慈溪人國初以明經舉二十九年任戶部

左侍郎

朱同直隸休寧人洪武中舉明經十五年任禮部右侍郎十六年坐事廢

儲可求直隸宜興人名才洪武初舉明經十六年任禮

部右侍郎二十年免

張智福建順昌人洪武中舉明經二十四年任禮部右侍郎二十六年謫學錄歷國子司業

鍾鼎浙江慈溪人洪武中舉明經十六年任兵部左侍郎本年卒

劉崧江西泰和人洪武初年舉明經十三年命以禮

部侍郎試吏部尚書本年致仕復起國子司業卒于

官

宋復初滑縣人訥次子洪武中舉明經二十六年任祭

酒

余焮直隸崑山人洪武初舉明經十七年任吏部尚書

十八年坐法

張統陝西富平人洪武初年舉明經三十一年任吏部尚書革除四年靖難師入尋自經于部之後堂

開濟河南洛陽人洪武初年舉明經十五年任刑部尚書十六年坐法

葛鈞河南洛陽人洪武中舉明經二十年任侍講學士
謫國子助教

吳頤河南歸德人洪武初舉明經十五年任祭酒十六年坐罪

楊松江西建昌人舉明經洪武二十九年任祭酒三十年免

張謙江西南昌人洪武初舉明經十年任刑部右侍郎

十一年致仕

和希文山西平定人洪武四年舉明經二十六年任刑部左侍郎

宋性山東德州人舉明經洪武二十九年以刑部主事署本部右侍郎三十年出爲湖廣副使

李至剛華亭人洪武末舉明經建文四年任禮部尚書永樂二年兼左春坊大學士三年降本部郎中下獄二十二年調興化知府宣德二年卒于官

武周文順天宛平人洪武中舉明經永樂四年任侍講學士

劉伯符吉水人洪武中舉明經二十四年任大理左寺

丞

唐廣雲名耕廣西桂林人洪武中舉明經永樂九年任祭酒

趙季通浙江天台人洪武丁卯舉明經永樂四年任祭酒

王嘉會嘉興人國初舉明經洪武十五年任祭酒
胡季安江西南昌人洪武初舉明經儒士二十五年任

祭酒二十九年坐黨罪免

朱俊浙江縉雲人由舉明經洪武二十年任刑部右侍郎本年免

歐陽性直隸吳縣人舉儒士洪武十八年任刑部右侍

侍郎二十一年免

胡子昭四川大足人洪武末舉儒士革除二年任刑部
右侍郎四年死靖難

溫祥卿山西人流寓浙江長興 國初舉儒士洪武十
七年任兵部尚書十八年降刑部主事歷四川布政
陳玄福建閩縣人洪武中以通經儒士薦 召拜右僉
都御史本年致仕

張克誠順天房山人舉明經洪武二十七年任左僉都
御史本年免

程本立浙江崇德人舉明經洪武三十一年任右僉都
御史革除四年以失誤調江西副使

趙民望直隸張城人洪武初以儒士舉十三年任夏官

兼 太子賓客本年免

顧或上海人洪武中舉明經二十六年任戶部右侍郎
唐汝楫西安人洪武中舉儒士永樂初任刑部侍郎
李祐山西安邑人洪武中舉者儒十三年任春官兼

太子賓客本年致仕

滕毅洪武元年以儒士歸附任吏部尚書二年陞江西

叅政

龔敷江西鉛山人洪武初以明經者儒薦國子祭酒十
三年任春官兼 太子賓客本年引疾

杜敷山西壺關人洪武中舉者儒十三年任夏官兼

太子賓客本年致仕

吳源福建莆田人洪武初舉明經者儒十三年任夏官
兼太子賓客本年以老歸後起國子司業

何顯周直隸內黃人洪武初薦舉者儒十五年任四輔
本年致仕

任昂河南河陰人洪武初年舉文儒十六年以禮部尚
書署吏部事十七年以年老致仕

趙瑁河南宜陽人洪武初年舉文儒十八年以吏部尚
書本年以禮部事坐法

李彥名直隸安州人洪武中以通經儒士舉用二十年
任禮部尚書二十三年致仕

班用吉河南延津人洪武元年舉儒士三年任刑部尚書四年降江西副使陞叅政坐事免歷應天府尹調四川按察使卒

馮冕河南孟縣人洪武初年舉儒士七年任刑部尚書十年以疾致仕

趙翥河南永寧人洪武七年舉儒士十二年任刑部尚書本年免

石璞河南陝州人洪武中舉儒士十三年由教諭陞戶部右侍郎

王中立山西平定人洪武中由儒士六年任禮部左侍郎本年致仕

儀智山東高密人洪武末儒士薦舉永樂六年任禮部
侍郎十九年致仕謚文簡

謝冕蒲州人洪武中舉儒士永樂元年任大理左寺丞
唐宗魯浙江建德人舉通經秀才洪武四年任工部侍
郎本年以疾歸

曹九臯山西潞州人舉秀才洪武十八年任左副都御
史二十年免

馬守中河南陽武人舉秀才洪武十九年任右僉都御
史二十九年免

戴綸山東高密人永樂初薦舉洪熙元年任兵部左侍
郎本年下半年下獄賜死

王中立隸定州人永樂中薦舉二十二年任太僕卿

李敬順天涿州人永樂中薦舉正統九年任吏部左侍

郎

周丹湖廣益陽人永樂初舉才能十一年任大理卿

趙琬直隸武進人永樂中舉明經正統九年任司業

鄭焜浙江浦江人永樂初薦舉宣德元年任大理左寺

丞

鄒濟餘杭人永樂中薦舉十八年任少詹事兼侍讀學

士謚文敏

李珉河東陳州人由薦舉宣德四年任左僉都御史

趙榮福建閩縣人陝西通渭縣籍正統中舉楷書生員

天順元年任七年卒

楊翁直隸吳縣人正統中薦舉十四年任兵部右侍郎

續文獻通考卷之四十八終